

周  
禮  
完  
解

周禮完解

京山郝敬著 男千秋千石校刻

讀周禮

周禮非闕也。而世儒以爲闕也。考工記非補也。而世儒以爲補也。非闕而使人疑其爲闕。非補而使人疑其爲補。是書所以奇也。五官之文直而正。考工之文曲而奇。人疑其裁自兩手而不知其同也。是書所以愈奇也。世儒謂漢儒補記。謂周公作五官。夫五官非聖人之作。而記亦非漢儒所能補。其諸六國處士之學。其縱橫之言乎。

世儒以六官錯雜疑其爲後人所亂如易以彖象附  
爻詩書以序附各篇春秋以傳附各年之類夫易詩  
書以類附爲便觀省也五官錯雜何爲者耶朱仲晦  
疑其爲草創夫官屬三百六十條分縷列無所不具  
獨一編次疑爲草創此求其說不得耳蓋是書取法  
天地四時天地之運成于五五爲參兩之合天惟五  
行人惟五事是書六官以配天辰十二省司空官屬  
以法五行而用五數非闕也曰然則宜散天官于五  
官可也以冬官分寄何也曰冬官主事而四時惟冬  
無事萬物冬藏故其官爲司空唐虞司空摠百揆卽

古之冢宰。天無爲而冢宰知始。冬無事而司空代終。故司空散寄于五官。卽冢宰兼攝乎百職也。司空兼考。冢宰兼職。一也。故易數水爲天。一道家以水爲上德。終始五德。吳大乎水。是以冢宰繼天。司空治水。功德同也。陽分六官以成歲序。陰省冬官以法五行。亦猶易數五而爻用六。作者以此變幻其旨。隱晦其文。蓋天所以能爲萬物主者。唯其不顯。君所以能爲萬民主者。唯其不測。不測之謂神。不顯之謂德。故乾元用九。潛而勿首。此作者之意。而世儒以爲錯簡。正墮其雲霧中矣。

周禮之事莫大于體國經野擇土中建王畿分九服制鄉遂稍縣都鄙皆地官之事也世儒謂當移屬司空若移屬司空則地官不爲虛名乎夫水土國邑本皆地事司徒旣爲地官則不得不任地事地官旣任水土國邑則冬官之闕亦不得不闕非偶闕也其餘惟有城郭宮室器用司空自宜任之然以之設官不足故別記工人以補司空亦不得不補非強補也六官異事而未始不相通四時異序而物生有早晚氣候有遲速造化人事之自然也故冢宰掌百官而司勲司祿又不屬冢宰司徒掌賦役而職歲職幣又

不屬司徒。宗伯掌禮儀。而行人司儀。又不屬宗伯。司馬掌防禦。而司門司關。又不屬司馬。司寇掌刑禁。而司隸司稽。又不屬司寇。事爲之官。官無專事。長必有貳。貳必有屬。一器一用。一泉一布。關通數職。無獨遂之權。如人一身。大小相維。四體并運。有如手持而足不前。耳聽而目不視。則支離偏枯。失其常度矣。今欲分疏六官。變易昔人之舊。以合後世六曹之例。安知今人之是。而古人之非乎。是或一道也。

四時五行。造化之秘。羲文作易。禹箕敘疇。皆取諸此。春秋以還。處士橫議。譚天炙轂。譎詭。壽張揣摩。飛鉗。

之說莫不援引五行而六經道裂實由于此是書之作經緯禮樂名物綱紀治教察其施爲次第實根本五德始終之意學術源委可得而窺矣

是書大抵欲使人主安富尊榮崇體執要如天運于上而以作爲之勞盡委于地春佈其德夏揚其威秋收其利冬考其成名實歸于富强而機謀主于隱密運于九地之下而發于九天之上管子所以霸齊商君所以强秦皆是物也

儒者謂周官之重在冢宰不知所重實在司徒其言曰惟王建國體國經野設官分職以爲民極人主所

以設官分職爲土地也。爲人民也。司徒主人民。地官主土地。則是人主所持力者。無如地官。司徒爲重。故其事獨煩。其屬多于五官。以此。

司空掌水土。自唐虞世已然。司徒之爲地官。則自周禮始耳。雖然。非是書始也。昔者聖人作易。地水爲師。水地爲比。水藏于地。兵藏于民。其道一也。故古之治師者。寓兵于民。及戰國韜鈴之家。飾易說爲陰符。乃有奇門遁甲。八卦飛伏。隱怪恢譎之譚。是書所用。其微旨與。

人君合五官爲主。造化令五氣爲天。易曰。天德不可。



爲首故王無名而冢宰首六官司徒宗伯司馬司寇如四體也。天官有統而無爲。萬物皆附于地。生長收成皆聽命于春夏秋三時。冬官無事而有終。自然之法象。非強作也。

世儒謂冢宰主爵祿官人。故其任重。不然也。古者興賢進能。爵人祿人。皆司馬之事。爵祿亦一事耳。冢宰無事不兼。故曰天官。所謂衮職也。王以官寄天。天以官寄四時。人主所以善藏其用也。故夫乾者居西北者也。西北者。無事之鄉也。

六官之屬。原無錯簡。作者意緒曉然可尋。支干家以

丑屬牛爲土。故地官之屬有牛。人雞司旦。故春官之屬有雞。人未屬羊。故夏官之屬有羊。人戌屬太。故秋官之屬有犬。人四畜分四官。其說本荒陋。然世儒以爲錯簡。議改訂。則非其本意矣。

世儒謂司徒掌五教。司空平水土。議改正。必若此。則宗伯當爲司徒。而司空稱地官可也。今旣以司徒充地官。則地官之兼水土。其義甚確。蓋世主所求多者。唯土地。而堪輿有空亡之忌。遊士滑稽逢迎。世主因以水土合德。併歸司徒。所謂揣摩飛鉗之旨。不足深究也。

儒者曰六官既立百度乃貞周公制禮之大經也此  
本尚書周官以論周禮夫周禮六官非尚書之六官  
也周官立冢宰司徒宗伯司馬司寇司空未嘗分天  
地春夏秋冬也設官分職未嘗辨方正位體國經野  
也六官整齊未嘗奪冬官之屬散之五官也是書用  
尚書之名而變幻其旨盡天下之事以爲官官天下  
之人以爲禮禮云禮云官云乎哉官不可以爲禮況  
以爲經禮也

周禮隱藏冬官錯列六屬牢籠百世學者卽此便是  
縱橫之習詳觀其布置經營全似管子內政蓋其學

本宗聖而雜以刑名功利焉可誣周公也

周禮非專爲禮設也。孔子曰。道之以德。齊之以禮。有恥且格。道之以政。齊之以刑。民免而無恥。周官三百六十。惟政與刑耳。如司徒之十二教。宗伯之五禮。巫數其物。而按其蒞官行事。未有教民之實蹟。孝弟仁讓之實事。故周禮之禮。未可爲禮也。

禮在天地間。惟三惟五。父子君臣夫婦。唐虞氏所謂三也。益以昆弟朋友。仲尼所謂五也。五者天下古今常行不易。所謂大經也。其曰禮儀三百。威儀三千。奉此周旋節文斯五者而已。鄭玄謂周官爲經禮。夫官

唐書卷一百一十五  
可以爲禮乎。大宗伯之五禮。是書變換其說。而鄭玄  
執以爲周公之禮。豈周公之禮。又異于堯舜孔子之  
禮耶。大抵禮教不明。一壞于聖遠經殘。百家補葺。淆  
亂而失真。再壞于鄭玄輩好信寡識。附合以求同。三  
壞于近代迂儒。妄生疑惑。紛更以亂舊。學者非超然  
玄覽。烏能自得師乎。

作是書者。蓋周衰好古之士。不得有爲。技癢求試。故  
言多摹古。而雜用術數。舛謬踳駁。什常八九。然以自  
鳴于百氏之林。亦鐵中之錚錚者矣。蓋其去古未甚  
遠。先王規制遺文。猶有存者。今學士欲考古。舍此何

適雖未卽真喜其近似耳

凡讀書明白易簡者聖賢之大道也其煩瑣隱僻  
百家之小術也周禮與大道相違遠矣六經言道德  
是書專言名法六經之辭易簡是書之辭冗僻

周禮之不可爲經也不在五官之錯亂而況五官本  
無錯亂也今儒者亟議改訂苟改訂矣周禮可遂行  
乎且如司徒鄉老一職而公卿大夫至下士凡一萬  
八千七百五十人。一市之中商賈幾何司市官屬凡  
一百四十二人。一商之肆自肆長至史二百有十人  
行此法也騷擾煩苛民其能堪乎此管商縱橫什伍

嚴密之政學者觀其節目不通其大綱喜其文字不  
思其義理見其布置不察其謀爲觀其名法不窮其  
源委猥以爲周公致太平之書及其舛迂不通反疑  
爲後人錯亂而不知是書之不可用者不在文辭之  
錯亂而在事理之踈戾其所以眩惑後世者不能掩  
其事理之踈戾而特譎張于文辭使人不可端倪耳  
今卽如世儒所訂六官一一整齊按其職以設官執  
其數以用人六官之屬十萬糜沸蟻動官多民少豈  
能一朝居不深惟其事理而徒以錯亂掩其謬戾左  
矣

讀周禮而後知道德功利周孔管商之分。疑似之間而已。蓋綱紀法度爲治之具也。挾智用術。遂至蝟毛繭絲。煩苛百出。則是以法度搢亂天下也。權謀之家。作俑使任放之徒。借口歸咎于聖人綱紀法度。以爲枝指懸疣。君子所以惡莠之亂苗也。自秦以前。百家橫議。苞稂害其嘉穀。自漢以後。諸儒承訛魚目溷其夜光。經術不明。其來已久。理學諸儒。自謂千古旦暮。詆空寂爲異端。而陰用二氏默坐澄心。以爲道斤。管商爲功利。而誤認周禮名法縱橫。以爲經。唯之與阿。相去幾何。是以窮經必先知道也。



六經者古聖人治天下之道是書則後世治天下之法天下神器可以道御不可以計算約束而望其必理也聖人貴道不貴法後世之治純用周禮正貳殷輔簿書期會把持約束使上下竭蹶稟承茲猶不敢舞其文固固法使然而實意胥削虛文相掩無事則苟且蒙蔽有事則頽塌不復振法亦無如之何矣故孟子曰徒法不能以自行周禮之書徒法而已矣是書所言高者不過古人名物度數卑者則簿書泉穀米鹽細瑣而已雖有仁義道德之名歸于功利富強之實名為禮而實與禮無涉學者無卓識隨人贊

和則千古無旦期矣。嗟夫。讀周禮而不知其非周公之書者。暗也。明知其非周公之書而不敢質言者。欺也。聖凡雖隔。不越此心。學者求信諸心而已。

行周禮之法。平居一出一入。皆有檢押。民間一泉一布。一馬牛。一車輦。皆有稽比。閭閻隸胥絡繹。四時會要徵求。訖無寧日。民生其世。如魚遊鼎釜。憂生理之蹙。而覺宇宙之爲隘。儻周公太平之書。然與否與六官之屬。皆詳于王畿。畧于侯邦。王者以四海爲家。法令獨詳于千里之內。則是偏枯之政。霸者富強之私耳。故夫儀禮詳于士大夫。畧于天子。周禮詳于王

國畧于諸侯謂天子以下可降而推大夫以上可邈而考與其實皆衰世補葺杜撰之書非先王之明刑也

周禮之爲周公亦猶左傳之爲左丘明也周公未嘗爲禮左丘明未嘗爲傳好信者耳食其名爲訛而已忠信曰周大道曰周始終循環亦曰周語云周旋中禮豈亦謂周公中禮與觀其言曰惟王建國辨方正位以五行八卦爲方以天地春夏秋冬爲位五氣循環周遊不息故曰周術家以天闕西北爲不周之方故是書託始于天而闕冬象之藏冬于地以應坎之

鄰乾鄒衍鬼谷畢所謂終始五德之運以道術爲滑稽禮法爲詖諧故其言本備而毀以爲殘其數本條而紛以爲錯其事本顯而遁以爲隱其文本周而詭以爲不周更自名曰周禮將以濫竿于夏商二代之間而世儒信以爲周公之禮幾不爲其所擲掄也乎  
○學古貴通方執一隅而譚周禮宜其不解也如秋官穴氏鬻氏涿壺赤友之類本謂政至秋而治定功成四方皆已削平惟是籬壁之間草木蟲蟻之妖莫不皆有銷磨厭勝之術以其滑稽運其權謀未可拘拘然核其實也必執事以論官執文以求解若何而

可。儒者不達妄謂從聖人廣大心胸流出夫炮土之  
鼓救日之弓。聖人廣大心胸中。何得有此等物。可笑  
也。

爲此書者。借古人影像鋪張自家胸臆。所載典禮名  
物。半真半僞。不可質辨。但覺瑣碎杜撰處多。又其道  
尚鬼。凡名法必先鬼神。大宗伯掌禮鬼事。強半。若先  
王之禮。專爲事鬼設者。故卜筮巫祝皆屬禮官。其言  
荒誕。違民義之訓。鄭玄崇信識緯。極力從臾。以爲周  
公之作。附合三代故事。多爲說而終難強通。善讀周  
禮者。以周禮讀之耳。不必問周公也。

六官名法多因先王舊典補葺成章其間馴雅正大  
可通行者是先王之舊也其瑣碎拘泥煩複不近情  
者後人之補造也故知變通損益之宜有玄覽獨照  
之識然後可與言周禮不然則其利天下也少而其  
害天下也多

按是書所詳者名數而名數不可盡拘也六官之屬  
三百有六十其人凡七萬有奇無常數者尚不與焉  
則是王朝庶官日食十萬人以推之列國一一按法  
用人盡天下之人以爲官亦不足矣蓋其所言不在  
人而在官不在官而在法因數之多寡以誌事之輕

重借官之秩序以寓法之詳委其所記典故名物不必皆有而時或杜撰以足數其言若迂濶而究其旨有所切指其名似懇款而按其事不必實用所言在此而意或出于彼要者反畧而其不要者反詳如司馬諸職多爲軍伍設而職目所云多非其正司寇之屬多隱語司徒治地居民大抵與司馬相表裏皆縱橫押闔之法善讀者覩其大綱布置以會通其旨至于目中隱顯出沒旁及其餘而不直指其端者亦可因一隅而窺其全矣

讀是書者觀五官布置經緯錯綜之意脩內謀外藏

鋒蓄銳之機。今行禁止。除姦剔蠹之法。課功計吏。勵精振作之權。理煩治劇。通明練達之識。秦漢而降。論吏事。未有能過之者。若夫區區辨六曹之職。掌訂簡編之殘闕。是守章句之鄙儒。抱案牘之迂吏。烏足與譚周禮乎。

從古有治人。無治法。所謂人者。非取備數而已。周官之屬。多至十萬。豈先王爲政在人之意。孔子曰。爲政在人。取人以身。脩身以道。脩道以仁。是書但知用人而不務取人之本。但知官備則政立。而不思人得然後官舉。苟徒具官而不察其人。人愈多而官愈冗。官



愈冗而事愈廢以此望治不可得已

世儒稱周禮精詳其實鶻突如大宰之八法八統九式九兩六敘八成六計司徒之十二教十二荒政大宗伯之五禮司寇之五刑士師之五禁五戒皆徒有其名而不詳其施行如司服之五冕五弁司弓矢之六弓四弩八矢王弧夾庾唐大之類亟數其物而不詳其制使後世訓詁之士懸空猜度猜度不中詭曰古有是禮今亡矣而不知古亦未必有是禮也前人杜撰作之後人杜撰解之今人又以杜撰改訂之嗟夫五齊三醴之說未明而議裸獻衮冕楊襲之說未

明而議服色。禘祫朝廟之說未明而議祭享。井牧之說未明而議賦役。耳食鄭康成之陋而議考訂五十步百步可笑等也。

周禮之要在體國經野。故其任莫重于地官。宅土中以建王畿。制鄉遂。稍縣都鄙以治內。分侯甸男采衛蠻夷鎮藩以治外。內爲井邑丘甸以正其賦。比閭族黨以居其民。伍兩卒旅以寓其兵。外爲朝覲會遇三年五年六年之期以序九服。此周禮之大端也。故鄭康成謂爲周公既營洛邑作此以授成王。然則皆周家已試之成法乎。而考成王盛時未嘗一日都洛也。

周之都洛。自平王始。平王都洛而周道衰矣。諸侯不朝。王政不行。六百里之畿封安所得。鄉遂都鄙井邑丘甸之法。朝覲會同九服時見之禮。體國經野託諸空言。而設官分職亦可知已。作者以意見揣摩。世儒以爲實然。豈非好信之過乎。

周禮非聖人純粹以精之書。然作者雄材大畧。亦自不可當實有瑕玦。文有純駁。理有是非。事有得失。自其本來。鄭康成妄擬周公。世儒闕然附和。遇紕繆輒歸咎于後儒之錯亂。嗟夫。後儒何能措一手也。謂後儒措手而亂之已非矣。又謂後儒措手而改訂之其

將能乎。朱元晦篤信好學。志大識短。欲考正六經。而  
其爲周易本義。疎淺無當。改毛詩古序。篇篇成錯。晚  
議變置三禮。割記以附經。未果。而世儒承旨。鹵莽硃  
裂。毀前人之舊章。違作者之初志。譬如補器。始猶微  
罅。今支離破碎。不復足觀矣。昔人所謂可痛哭流涕  
者也。

說者謂六官闕司空。以考工記補之。今觀其因蓋。昭  
合原。非增補其辭氣。矯然先秦。戰國風調。漢興陸賈  
諸人不能辦。而求諸建元以後。愈不合矣。自是本初  
決非添設。就使添設。亦卽作周禮者有意爲之。非後

人所能辦也。其器卽五官所用之器。其法卽五官所共守之法。五官之屬三百三十有六。記之工二十有四。合之適滿三百六十。五官之屬闕十一。而記之工闕六。謂爲偶爾抑何其天然符合也。戴記曲禮下篇亦有五官六工之說。與是書正同。故周禮非闕考工記非補。所以小變其體者。如樂終亂之以武。如六師振旅。正出奇歸以極。文章之變。使周禮無記。五官方幅。何異除目。是書所以變而愈奇也。

周禮有考工記。亦猶儀禮諸篇終各繫以記也。世儒不疑儀禮之記爲添補。何獨于周禮疑之。至戴記四

十九篇。世儒欲以分附諸禮。非其記者。欲強爲記。以附經。其爲記者。又欲離經以割記。顛倒疑惑。訖無定識。徒爲智者所竊笑耳。

術家之事。尚陰謀。故周禮精神全注于冬官。夫人日用而不知者。惟器爲然。易曰。形乃謂之器。成而用之。謂之法。民咸用之。謂之神。孟子謂一人之身而百工之所爲備。五官之事。誰非工也。故其言曰。國有六職。百工居一。藏神于器也。冬水司。令而水反涸。天下之物。柔而善藏者。惟水。天一生水。乾初主潛。故司空主事而無事。周禮之秘在司空。

朝廷之事莫非工也。國家之用莫非器也。工以人代天。器以用前民。凡記所列城郭宮室車旂弓矢戈戟鐘磬筍簋玉帛之類。六官禮樂征伐咸用之。器具矣。六官分布其體。考工閱實其用。有官無考。則其器苦。官具而器不中程。則其工曠。是以有五官不可無考工也。

六官名屬次第。如春秋之有經。詩書之有古序。一書之綱領也。舊本置之篇端。後儒疑有錯誤。不知其所經營正在此。至于各職繫事。如綱之有目。吳幼清考訂三禮。削而不用。讀其職事而不知其官爵之崇卑。

人數之多寡與夫宦寺婦女工賈奚奴之異何以辨其職事哉。宋元晦改詩序。黜易序卦。其敝與此同。今引以貫各職之前爲綱。分繫其事爲目。庶讀者便觀省焉。

凡禮者義而已。古今不同時。而禮可以義起。三禮所載不必盡同。損益之義。百世可知。學者兩端用中。較若畫一。苟穿鑿比擬。如前之爲訓詁者。旣非妄臆改訂。若今之爲考註者。尤謬斷鶴之頸以益鬼。裁狗之皮以補貂。豈惟喪其舊觀。亦且乖其常理。不知而作。其斯之謂。



鄭康成解周禮多紕謬有本文明白易曉而註反牽強不通者如天官掌次設皇邸皇者美大之稱也鄭註云染鳥羽象鳳凰色爲屏風王府云王之獻金王兵器良貨賄本謂王所受諸侯之獻也鄭註云王作以獻諸侯小司徒職云凡征役之施舍施謂加役舍謂免役故論語云君子不施其親謂親者免役也顏淵曰勿施勞謂不以勞役加人也故國語云聖人之施舍也議之鄭註施作弛牛人職云祭祀共其享牛求牛以授職人而芻之本謂祭享用牛求牛之純全者授充人芻養待用也鄭云享牛祭日用之求牛明

日繹用之則是二牛也。地官司市云偽飾之禁商賈  
民工各十二。大較分數然耳。鄭謂爲四十八禁。引王  
制不粥于市等語實之外。少十二以爲未聞。天官凡  
嬪世婦女御本皆職官內臣也。鄭以分奉王寢半月  
而週后土本卽社神。鄭謂句龍爲后土死而配享于  
社。非卽社也。秋官士師祭勝國社稷爲之尸。本謂刑  
屬金。殷金周火德勝之故以刑官爲亳社尸。鄭謂爲  
爲畧之春官掌客諸侯饗禮十有二牢。本謂諸侯饗  
天子數用十二。鄭謂爲王饗諸侯。秋官閩隸云掌子  
則取隸焉。本謂閩隸掌養鳥子。公用鳥子則取于閩

隸鄭謂王立世子取隸卒秋官大司寇禁民獄訟訟有罪卽是獄鄭謂以財相告爲訟以罪相告爲獄秋官蜡氏掌除骹蜡卽八蜡之蜡與魚腊之腊通骹骼之乾者爲腊鄭變作蠅蟲之蛆司烜氏掌火烜卽詩赫兮烜兮之烜火明也鄭變作衛侯燬之燬庶氏掌除毒蠱庶者痊可之意鄭變作藥煮之煮春官甸祝禱牲禱馬禱與禱同祈也詩云旣伯旣禱旣差我馬謂禱牲求獲禱馬求健鄭變禱作伏誅之誅秋官掌囚云中罪桎桎械在頸曰桎如春秋傳宋樂轡以弓戲桎華弱周易童牛之牯皆在首也鄭謂在足爲桎

秋官士師荒辨之法令民通財糾宇緩刑治獄訟卽是辨治凶荒之法鄭謂辨作貶冬官桃氏爲劔設其後謂手所把之後設首也鄭訓設爲大賈氏因引易長裕而不設附會之畫績之工山以章本謂山高設色宜章明也鄭謂章作璋畫山當畫璋天官大宰懸治象挾日而斂之挾與夾同閒一日謂之挾蓋三日也鄭變挾作浹天官九式曰匪頒之式匪與斐同文貌詩云有匪君子細而均故文鄭變匪作分宮人職云除其不蠲蠲潔也鄭因儀禮圭爲而哀薦之語變蠲作圭冬官弓人云弓有六材維幹強之張如流水

維體防之引之中參維角穿之六語三韻二句相連  
鄭以維幹強之張如流水爲句解云無難易也維體  
防之引之中參爲句解云納槩中也凡此之類豈非  
文義本明白而鄭解反不通者乎亦有文義不明而  
鄭誤猜者如地官媒氏職云禁遷葬者與嫁殤者本  
謂夫妻合葬信堪輿之說改域別遷男女幼未可婚  
信祿命之說早嫁免殤皆非禮也而鄭謂生非夫婦  
死相從爲遷葬女未嫁死與男合葬爲嫁殤天官內  
饗職云馬黑脊而般班臂螻按內則螻作漏馬蹄瘡  
如螻孔曰漏螻螻也鄭謂馬肉螻姑臭又殤醫職云

腫瘍之祝藥祝斷落也猶祝髮之祝凡瘡厯落則痊  
鄭變祝作注地官族師春秋祭酺酺醪也合出錢飲  
酒曰酺卽漢法賜大酺鄭變酺作步爲馬崇之神也  
地官遂師大喪及窆抱磨古者窆用甃磨確用之王  
莽則遂師抱磨示躬役也鄭變磨作歷謂抱策歷數  
執紼人名也冬官玉人大圭杼上終葵首杼杵同猶  
輪人爲輪行澤者欲杼之杼謂圭形上刻而圜如杵  
終葵卽爾雅所謂繁露本草謂之冬葵卽終葵冬終  
也今之黃葵秋開者其花葉大得露多故稱繁露葵  
性朝日比下天子爲道揆之首故刻葵圭首猶蓂莢

之零露澤及四海也。鄭謂杼作舒。引齊語椎頭終葵。徵是以爾雅中。植當終葵。以菡當葵也。夏官司兵職。建車之五兵。本謂車上建立戈。矢。戟。酋矛。夷矛。五不言弓矢者。弓矢不可建立。而車中自有弓矢。詩云。不失其馳。舍矢如破。又云。公車千乘。二矛重弓。鄭謂步兵之五兵。無夷矛。而有弓矢。車之五兵。有夷矛。而無弓矢也。冬官輅人云。輅欲其頎典。又云。馬不契需。頎長也。典堅也。謂車轅欲其長而堅也。契與契通。猶食也。需與濡通。煩攔也。謂輅良。則馬不受其煩攔。鄭變頎典作懇珍。變契需作法懦。輅人云。殷畝而馳。殷隱。

也車行疾聲詩云殷其雷鄭解殷作橫行又車人云  
車渠渠與規通謂輪迴迴也鄭謂渠爲輪牙又弓人  
云弓而羽殺凡弓隈曲處稍薄曰殺弓柎無力則兩  
隈動搖如鳥羽也鄭變羽作毫又弓人斲目欲茶茶  
茅秀和柔也故玉藻諸侯笏之不挺直者爲茶木節  
挺直斲之使茶鄭變茶作舒玉人駟琮七寸天子以  
爲權駟之言粗也市僧之稱駟善評物價故權物之  
琮謂之駟琮鄭變駟作組如此之類皆文義不明而  
鄭遂誤猜者也其他不及枚舉附見各章



周禮官職實錄

天官之屬實六十有三

大宰

小宰

宰夫

宮正

宮伯

膳夫

庖人

內饗

外饗

亨人

甸師

獸人

敝人

鼈人

腊人

以上第一卷

醫師

食醫

疾醫

瘍醫

獸醫

酒正

酒人

漿人

凌人

籩人

醢人

醢人

鹽人

冢人

宮人

掌舍

幕人

掌次

大府

王府

內府

外府

司會

司書

職內

職歲

職幣

司裘

掌皮

內宰

內小臣

閤人

寺人

內豎

九嬪

世婦

女御

女祝

女史

典婦功

典絲

典臬

內司服

縫人

染人

追師

屨人

夏采

以上第一卷

地官之屬實七十有八

大司徒

小司徒

鄉師

鄉老

鄉大夫

州長

黨正

族師

閭胥

比長

封人

鼓人

舞師

牧人

牛人

充人  
以上第  
三卷

載師

閭師

縣師

遺人

均人

師氏

保氏

司諫

司救

調人

媒氏

司市

質人

廛人

胥師

賈師

司虢

司稽

胥

肆長

泉府

司門

司關

掌節

遂人

遂師

遂大夫

縣正

鄙師

鄧長

里宰

鄰長

旅師

稍人

委人

土均

草人

稻人

土訓

誦訓

山虞

林衡

川衡

澤虞

迹人

斗人

角人

羽人

掌葛

掌染草

掌炭

掌荼

掌蜃

圉人

場人

廩人

舍人

倉人

司稼

春人

饘人

藁人

以上第四卷

春官之屬實七十

大宗伯

小宗伯

肆師

夢人

鬯人

雞人

司尊彝

司几筵

天府

典瑞

典命

司服

典祀

守祧

世婦

內宗

外宗

冢人

墓大夫

職喪

以上第五卷

大司樂

樂師

大胥

小胥

大師

小師

瞽矇

眡瞭

典同

磬師

鐘師

笙師

搏師

執師

旄人

箛師

籥章

鞀鞀氏

典庸器

司干

大卜

卜師

龜人

蕪氏

占人

筮人

占夢

眡祿

大祝

小祝

喪祝

甸祝

詛祝

司巫

男巫

女巫

大史

小史

馮相氏

保章氏

內史

外史

御史

巾車

典路

車僕

司常

都宗人

家宗人

凡以神士者

以上第六卷

夏官之屬實六十有五

大司馬

小司馬

司勲

馬賁

量人

小子

羊人

司燿

掌固

司險

候人

環人

挈壺氏

射人

服不氏

射鳥氏

羅氏

掌畜

以上掌七卷

司士

諸子

司右

虎賁氏

旅賁氏

箠服氏

方相氏

大僕

小臣

祭僕

御僕

隸僕

弁師

司兵

司戈盾

司弓矢

繕人

橐人

戎右

齊右

道右

大馭

戎僕

齊僕

道僕

田僕

馭夫

校人

趣馬

巫馬

牧師

廋人

圉師

圉人

職方氏

土方氏

懷方氏

合方氏

訓方氏

形方氏

山師

川師

蓬師

匡人

擇人

都司馬

家司馬

以上第八卷

秋官之屬實六十有一

大司寇

小司寇

士師

鄉士

遂士

縣士

方士

訝士

朝士

司民

司刑

司刺



司約

司盟

職金

司厲

大人

司圜

掌囚

掌戮

司隸

罪隸

蠻隸

閩隸

夷隸

貉隸

以上第九卷

布憲

禁殺戮

禁暴氏

野廬氏

蜡氏

雍氏

萍氏

司寤氏

司烜氏

條狼氏

脩間氏

冥氏

庶氏

穴氏

翬氏

柞氏

雍氏

砮族氏

翦氏

赤友氏

蜎氏

壺涿氏

庭氏

銜枚氏

伊耆氏

大行人

小行人

司儀

行夫

環人

象胥

掌客

掌訝

掌交

朝大夫

以上第十卷

冬官工人實二十有四

輪人

輿人

輶人

築氏

冶氏

桃氏

彫氏

栗氏

函人

鮑人

鞞人

畫績

鐘氏

愰氏

以上第十一卷

玉人

磬氏

矢人

陶人

旒人

梓人

廬人

匠人

車人

弓人

以上第十二卷

按小宰職云六官之屬三百六十今檢其職事天官之屬六十有三地官之屬七十有八春官之屬七十夏官之屬六十有五秋官之屬六十有一冬官之工二十有四合之適滿三百六十有一此皆有文有事可据六官之實數也周天之數三百六十今多一者天官冢宰不列三百六十內以象天而尊王也如易大衍五十虛一此贏一也故官府六屬不繫于冢宰而繫于小宰其意可知檢原數地官多一夏官秋官各多五冬官工多六而皆有官無事稱為闕文果爾則又不止三百六十是書變幻多端但核其實意自

月  
三  
解  
卷  
一  
曉然冬官之闕非真闕也諸屬之闕又烏足信乎

周禮完解卷一

郝敬習

周禮一書。儒者雜陰陽名法家所爲治天下之法。根本術數。而依附禮經。襲用八卦方位。五德始終之運。配以尚書周官六職。推廣其條爲三百六十。以合周天之數。陽匿其端。使參差離散。若爲古禮殘缺不周者。而詭名曰周禮。孔子嘗自言吾學周禮。將遂以此濫竽于公旦之作。其滑稽之雄者與。天地定位。四時成序。月令明堂十二居。五氣周流。亦卽此意。而其名實變幻。莫可端倪。于各官首。輒云辨方正位。體國經

野引而不發。使數千年來。罔象索之。而不獲。亦甚奇已。

### 天官象宰第一

天官何也。五氣之運。始于水也。主水而曰天官。何也。八卦乾爲天。位居西北。秋氣至。乾堅凝。一陽動于子。而坎水生。爲乾初氣。所謂天一也。故圖書之數。一居北。父無正位。而子用事。君無爲而冢宰代天。體至剛。而用至柔。老氏曰。上德若水。曆家黃鐘當子。爲君位。故冢宰代君稱天。首六官也。冢。大也。山頂曰冢。山大而頂在上。太上之稱。宰。猶尹也。割正之名。卽古百揆。

阿衡後世之平章也

按周天十二辰三百六十日。冢宰首六官。統三百六十職。故是書稱天官。然天何可以名官。官有司也有司職詳。而天無爲主。亦無爲。春秋繫王于天。惟天爲大。惟王則之。官稱天。其何以稱王。今以六官取象天地四時。于義亦未協也。考其所屬。天官之屬不皆天地。官之屬不皆地。四時亦然。冢宰旣官天。統四時。又與五官分曹並列。其于天之義亦未甚協也。庖廚醫藥縫染。豈官天者所宜司。而或者謂王起居服御。宮禁內天官宜爲主。然輔養君德。調燮庶政。事亦多矣。

何獨庖人縫人之類。本欲交掣其權。陽縱陰操。託天時氣運。以寓縱橫之義。云爾。非如後世六曹分隸之謂也。記曰。政者。聖人所以藏身之固。王無位而散爲六官。六官散爲三百六十三百六十合爲六。六藏爲五。五旋爲一。微顯錯綜。皆陰陽名法。飛箝押闔之旨。所以爲藏身之固。而讀者不解。疑爲錯亂。則正墮其雲霧中矣。冢宰先六官。卽後世宰相總百職。漢以吏事責三公。唐以宰相領度支。皆師此意。元吳澄氏謂冢宰非宰相。引尚書周官三公三孤坐而論道者爲宰相。不知周禮周官均之非古。不可相徵。冢宰稱天



權兼六官。非宰相而何。所以與六卿並列者。誠不欲  
冢宰專制六卿。以防偏重。立法之意。過漢唐甚遠。六  
官任天下事。又使無事之公孤坐而彈壓。則六卿不  
得關其職矣。且所論何道。所遣何事。豈道外別有事。  
事外別有道。與大宰六典。司徒十二教。宗伯司馬禮  
樂征伐。非道與。大宰不可論。必三公三孤。然後足論。  
與天官冢宰。名位已極。冢宰而上更置宰。天官而上  
更設官。其名義亦不似。周公召公爲冢宰。司空兼師  
保。稱公。卽六卿之耆碩者。非別有公孤在六卿上。自  
爲宰相者也。主國計理財賦。正乃先務。豈其坐而論

道者。遂一切不關天下事。與大抵古治天下。道與事。政與學爲一。後世治天下。道與事。政與學爲二。士貴學賤。政官左。政右。學館閣。謂清秩錢穀。謂冗司。經筵體崇。簿書職卑。宰相與六卿禮絕。而治道漸不如古矣。東晉尚清譚。南宋宗理學。豈不論道究竟何益。古稱無爲而治者。豈坐而論道之謂。與苟以是書爲聖人之舊。一切泥其法爲政。非也。其以是書爲非。聖人之舊。一切毀其法爲政。亦非也。善乎孟氏有言。徒法不能以自行。徒善不足以爲政。學者苟會其義。何必周禮。然後能治天下哉。

惟王建國辨方正位。體國經野。設官分職。以爲民極。乃立天官冢宰。使帥其屬而掌邦治。以佐王均邦國。首稱王。六官共宗也。建健也。立也。易云。天行健。健乾也。乾爲天。爲君。國者君所自立。惟健能立。故是書以明作爲體。以名法爲用。以綜核爲政。以富強爲業。六官首言惟王建國。能建國所以爲王也。辨方正位。四語全篇要領。天地有八卦之方。九宮之位。天有九野。經以二十八宿。其說雜見占候堪輿等書。人君辨別方位。體此立國。如列宿經絡九野。天地四時之官所由設。而三百六十職所以分也。蓋辨方正位。法天也。

體國經野制地也。設官分職治人也。參三才以立極。故能廓然無我。與天下賢才共治。王者中上下四維。爲位。合萬國九州爲體。聯六官庶職爲心。如天地四時運而莫見其爲。是書之機畧也。邦治謂一切治。邦國之法。總六官之事而言。其屬謂小宰以下。至夏采六十有三職。均平也。宰制使平也。

按是書各篇首稱惟王。以明命官之意。篇中不列王位。六官皆王也。鄭氏以周公營洛邑附會。夫興作與官職何涉。必洛邑建而後設官分職。洛邑未建而官職得已乎。所謂辨方正位者。卽天地四時之方位所

謂體國經野者。卽司徒相地中以建王畿。分五則以制內。畫九服以護外。比閭族黨以聯民伍。兩卒旅以寄軍。爲是書機畧。然非周公之制也。周末嘗一日居洛。其營土中。爲巡守朝諸侯均道里節勞逸耳。天子不居東。雖有前法無所用。必若九服豐鎬正當西方。采衛蠻夷間。公劉至文武成康下迄幽厲。世居西土。何待營洛而始建國。故是書爲後人揣摩而作。三百六十職掌土地人民財賦兵役皆王畿以內。于鄉遂詳而于邊鄙畧。于王都密而于侯服疎。殆富強偏霸肥已瘠人之術。非蕩平天下之遠謨也。

治官之屬

治官卽天官屬。謂小宰以下職六十有三。其人三千八百二十有一。

大宰卿一人。小宰中大夫二人。宰夫下大夫四人。上士八人。中士十有六人。旅下士三十有二人。府六人。史十有二人。胥十有二人。徒百有二十人。

此大宰一職之綱。是書設官分職經緯次第皆見于綱。下繫職事皆其目也。世儒倒見疑是書錯亂欲割此棄之。夫無綱何以張目。今引綱貫目分目屬綱庶便檢省。後皆倣此。大宰卽冢宰。變冢稱大首六官爲

冢長本職爲大卿卽大宰。宰有剗割意。有調和意。所以謂治官也。大宰小宰宰夫皆職名。卿大夫士上中下皆品秩。後倣此。小宰副大宰。宰夫副小宰。降至胥徒遞相爲副。所謂正貳考殷輔之類是也。凡副人數各加所副一倍。貴者少而賤者衆。尊者逸卑者勞也。旅衆也。下士獨言旅人衆也。自下士以上皆命于王府史以下。則長官所自辟除。孟子謂庶人在官者是也。府藏簿籍。史治書文。胥謂通有才智者。徒役也。徒常十倍胥。胥爲什長。六官自卿至徒爲十等。十者天地之終數。

按大宰一職而用人至三百一十有三。是書之作主官人。欲以官該天下事。不知官多。事愈擾。徒設官以分事。不擇人以任官。未有能理者。

大宰之職。掌建邦之六典。以佐王治邦國。一曰治典。以經邦國。以治官府。以紀萬民。二曰教典。以安邦國。以教官府。以擾萬民。三曰禮典。以和邦國。以統百官。以諧萬民。四曰政典。以平邦國。以正百官。以均萬民。五曰刑典。以詰邦國。以刑百官。以糾萬民。六曰事典。以富邦國。以任百官。以生萬民。

自此以下。皆大宰職之目。餘倣此。大宰官。天明代王。



也。王德不官，故舜率官，天而兼五官，是以有六典建邦，卽惟王建國也。凡職必言建邦，共奉王也。君臣相與建立，明作幹理，則政無不舉。邦國、邦畿及侯國，大曰邦，小曰國，治猶爲也，經猶綱也，紀猶目也，皆治意。百官所居曰府，官府謂六官之屬，諸侯長百官，官府長萬民，故治有先後。總五官謂宰，兼五典謂治，經國紀民不外于教。禮、政、刑事，教典，地官司徒之事。孟子曰：不教民而用，謂之殃民。教有法，所以安之、擾安也。猶治言亂也。禮典，春官宗伯之事。禮行則上下睦，故曰和。統諸皆和意。百官猶官府，前二官稱府，後四官

稱百。殊天地也。體莫尊于夫。任莫重于地。故大宰無專職。而司徒兼司空。大宰代王。而司徒代相也。政典。夏官司馬之事。政正也。征也。征伐以正不正。平均皆正。憲刑典。秋官司寇之事。刑形也。法也。物刑而后成。形可法。詰窮究也。刑百官。示法百官也。詩云。百辟其刑之。糾約束也。事典。冬官司空之事。工作曰事。記云。來百工。財用足。故曰富。任責任以事。考工記云。國有六職。百工與居一坐而論道。謂之三公。作而行之。謂之士。大夫。書曰。無曠庶官。天工人其代之。所謂任百官也。用足而財富。所以生萬民也。

按教禮刑政事五者皆所以爲治司徒宗伯司馬司  
寇司空五官皆總已聽于冢宰地與春夏秋冬皆運  
行于天天地四時皆會同于五氣天始地終而六官  
不言王天所以退藏于無也五過則悔地所以進藏  
于有也君退而藏以任其臣臣進而藏以覲其君君  
藏于無故大宰首五官而獨尊臣藏于有故地官虛  
司空而無屬君神而康故潛不爲首臣形而勞故終  
無專成君藏于無同心一體以善用其臣臣藏于有  
勞謙不伐以善事其君故大宰曰治治無專事司空  
曰事事無專治古之司空總百揆卽後世之大宰也

後世以司空爲水土之司。不知水土之卽天地也。吳澄氏考三禮引尚書周官爲徵。夫周官與周禮均後人摸倣爲之。烏足以相徵。彼謂冢宰掌邦治。司徒掌邦教。未嘗請冢宰爲天官。司徒爲地官也。謂宗伯掌邦禮。司馬掌政。司寇掌刑。司空掌土。未嘗以四官分四時也。今旣分天地四時。義與周官自不相蒙。司徒旣爲地官。而不得預邦土。何取爲地。苟司空掌邦土。又加司徒爲地官。不已複乎。此司徒兼司空意曉然。作者欲錯綜微顯。睽以爲合。別以爲附。翕以爲張。不見其形。而陰脩默成。權謀之家所貴爲治術也。數無

奇不耦無間不齊日月無錯不成寒暑王者無術  
不成事功是書所以體柔用剛外陰內陽寡首匿尾  
雜施越出不可方物貴揣摩而尚陰符之道是故大  
宰爲天官水德資始含洊淵靜柔而能平故能斟酌  
淺深方圓適中淡泊玄漠百度乃和所以爲大宰然  
詩書論治多矣皆本諸脩身要諸知人而是書六典  
八法八則八柄皆由冢宰詔王行而初不明冢宰何  
如人其言典法多端而其所以致君者無一焉所以  
自靖者無一焉得人賢則旋乾轉坤惟所欲爲不賢  
則震主竊國如莽操懿溫由斯作俑矣烏可以輕嘗

註也

以八濶治官府一曰官人以舉邦治二曰官職以辨邦治三曰官聽以會官治四曰官常以聽官治五曰官成以經邦治六曰官濶以正邦治七曰官刑以糾邦治八曰官計以弊邦治

八濶衆宰所以治朝廷也官屬六官之屬舉共舉天下非一人之任羣力集則治可舉官職六官所執之事辨言辨也官各執事則治無不辦聯連也官職雖分政同一體此主其要彼贊其成相連合也官分言人邦統言政常常職人易而職守不變曰常聽猶待

也待人而任也。成定規一定不改曰經。法以示必守曰正刑以懲不法曰糾計稽考也。弊斷也大計羣吏以斷優劣也。

按八濫之目可芟也。職卽常常卽成成卽法。旣曰八濫又曰官濫不已。複乎天下之事天下之人爲之官得人人舉職於治何有。是書首治官府終考工可謂知要然皆綜核之意。非知本之務。書曰知人則哲能官人。失于人而求于官。表曲望景直不可得矣。雖有常有成有刑有法操術甚詳安能強人從法必能官人而後八法可用也。六經言道德是書專言名法六

經尚簡要是書專務煩瑣其非周公之制作何待知者而後知

以八則治都鄙一曰祭祀以馭其神二曰漚則以馭其官三曰廢置以馭其吏四曰祿位以馭其士五曰賦貢以馭其用六曰禮俗以馭其民七曰刑賞以馭其威八曰田役以馭其衆

則猶法也朝廷曰法都鄙曰則國外部內地曰都鄙王子弟及公卿大夫采邑在焉詳見地官載師職都美也鄙陋也市居繁華曰都野外荒僻曰鄙蓋邊境縣邑之通稱地雖分封王子公卿大夫而法制自朝



廷首祭祀重鬼神也。馭御同治事曰御。治事有緩急如馭馬有操縱。故通謂馭祭祀謂祀宗廟社稷之類。各有典秩以治其神也。濫則羣臣居官奉職之法度廢棄也。置舉也。吏猶官也。廢其不能舉其能以治吏也。有道德行藝則予之祿位以治士也。賦采地之賦臣取于民者貢都鄙之貢諸臣轉奉于王者量民力以制賦量臣入以制貢使上下均足以治其用也。禮俗以禮齊民俗田四時田獵訓武役興作皆依時如法以治其衆也。

以八柄詔王馭羣臣。一曰爵以馭其貴。二曰祿以馭其

富三曰予以馭其幸四曰置以馭其行五曰生以馭其福六曰奪以馭其貧七曰廢以馭其罪八曰誅以馭其過

此總叙馭羣臣之法不及民者宰馭臣臣馭民執要也柄所以操詔告也八柄八統威福大權必告諸王而后行馭者掌握之意以賞慶刑威掌握榮辱生死也品秩曰爵官俸曰祿賞賚曰予恩寵曰幸舉用曰置行德行也赦宥曰生吉祥曰福侵削曰奪奪則貧矣廢黜也誅殺也過犯也

按八柄之目慶賞刑威盡矣旣曰富貴又曰予以置

旣曰幸。又曰福。旣曰奪。又曰廢。不亦復乎。罪止廢過。卽誅。亦未當也。名主于密。法主于嚴。嚴與密。非聖人所以爲治。是書尚名法。而用法必曰誅。鄭謂爲責讓小過耳。小過責讓。何關大柄。而必詔王。八事有生。自不得無殺。如宰夫以官刑告冢宰而誅之。之類皆殺之也。五官正歲觀象。狗以木鐸。亦曰國有常刑。有大刑。皆申商之意。夫天道純陽而至剛。乾居西北。金老堅凝。一化爲水。柔以運剛。故大宰八柄。八統奉天時行。乃可以調和百工。若使君失其乾。宰專其柄。不詔王而自用。是八物者。姦雄之泰阿耳。故是書未可輕

試也

以八統詔王馭萬民。一曰親親。二曰敬故。三曰進賢。四曰使能。五曰保庸。六曰尊貴。七曰達吏。八曰禮賓。

統者。聯合之名。柄尚嚴。統尚寬。先柄後統。先猛後寬也。猛以繩其臣。寬以調其民。操縱之要也。親親以下八者。詔王行此以帥民。使皆由之也。敬故不忘舊也。進賢。尊有德也。使能用有材也。保庸。安有功也。尊貴。敬有爵也。達吏。拔幽滯也。禮賓。重交際也。

按此八者。聖王務之。所謂不賞民勸。不怒民威之本也。其不以後生殺予奪可知矣。

以九職任萬民。一曰三農生九穀。二曰園圃毓育草木。  
三曰虞衡作山澤之材。四曰藪牧養蕃鳥獸。五曰百工  
飭凡化八材。六曰商賈古阜通貨賄。七曰嬪婦化治絲  
枲。洗八曰臣妾聚斂去聲疏材。九曰閭閻無常職。轉移執  
事。

此以下四節皆生材制用之法。國計民生莫重于財。  
天官主水。為生物之源。財用屬焉。職業也。任責成也。  
民有常業。然後財賦出。故先責任以職業。三農高陸  
平原。下濕。九穀黍稷稻粱麻。大小豆。大小麥。毓育同。  
草木瓜果之類。虞度也。衡平也。掌山曰虞。掌水曰衡。

作興也。山澤之材，林木魚鼈之類，水希草生曰藪，可爲牧地，以養蕃鳥獸也。百工衆匠作飭化，整飭變化八材。爾雅謂骨、象、玉石、木、金、革、羽，飭化材具，所以爲器用也。行曰商，居曰賈，阜盛也，通交易也。金玉曰貨，布帛曰賄。嬪婦人善事之稱，臬麻也。化絲爲帛，化臬爲布，皆嬪婦之職。男僕曰臣，女婢曰妾，聚斂摺拾收積也。疏猶散，杜也。凡物可備用者，皆曰材。俛拾仰取，針芥瓦礫，無物非用，聚斂散材，臣妾之職事也。鄭謂取百草根實可食者，此其一耳。閒民，空間之民，已無常業，以餘力轉移他人，代爲執事以資生，亦一職也。

按九職皆生財之事。名爲任民。其實聚斂。斂財先任民也。九者。農、桑、本、園、圃以下。一切營生之術。目愈多而算愈細。孟子謂用其二而民有餘。用其三而父子離。況乃九乎。如謂使民自爲生。則焉用大宰之法爲也。天施地產。人生自足。但無虐政以害之。無厲禁以專之。則人各利其利。各生其生。何事于上之數職而分任之也。

以九賦斂財賄。一曰邦中之賦。二曰四郊之賦。三曰邦甸之賦。四曰家削。肅之賦。五曰邦縣之賦。六曰邦都之賦。七曰關市之賦。八曰山澤之賦。九曰幣餘之賦。

此賦民之法。上取乎下。謂賦九賦。卽取于九職者。自  
邦中至邦都六等。皆三農之田稅也。邦中。王城內外  
之地。四郊。王城外百里。六鄉之地。邦甸。又外二百里。  
六遂之地。削作稍家。削。又外三百里。大夫之采地。邦  
縣。又外四百里。鄉及諸王子弟之采地。邦都。又外五  
百里。公及親王子弟之采地。王畿四面各五百里。各  
有闕門。城市。工商往來居停。則有稅。卽九職之商賈  
百工也。山稅材木。澤稅魚鹽。卽九職之虞衡也。幣。卽  
九職嬪婦之絲枲也。餘謂一切小利。卽九職之園圃。  
臣妾閭民之屬。諸不在正賦內者。皆曰餘。又幣。敝通。



殘瑣皆曰敝餘鄭註謂職幣所掌公用餘幣斥賣者然則不謂之賦矣

按王制天子百里之內以共官千里之內以爲御今邦中四郊皆九賦所斂則是百里之內皆爲御矣孟子云關譏而不征旅願出于途市廛而不征商願藏于市今關市皆有征豈先王之制

以九式均節財用一曰祭祀之式二曰賓客之式三曰喪荒之式四曰羞服之式五曰工事之式六曰幣帛之式七曰芻秣之式八曰匪頒之式九曰好用之式

此言用財之法式限制也均節量入爲出使適中也

喪荒賙賻賑貸之用。羞服膳羞衣服之用。工事宮室  
器皿之用。幣帛贈勞聘享之用。芻秣黍養畜牧之用。  
匪均貌。詩云有匪君子。記云車馬之容。匪匪翼翼。頒  
班通分也。國有大事行賞徧及如犒勞三軍之類。好  
用王所幸好則用賞賜卽予以馭幸也。

按是書主富強而其旨隱其言利依附王道而錙銖  
纖蓄自不可掩。至兵則緘口深諱。國之大費莫急于  
軍興。冢宰制用九式獨不及豈其遺之其韜晦可知。  
而所謂芻秣匪頒者。隱然已備法詳小司徒管子所  
以作內政寄之使敵不知所備也。

以九貢致邦國之用。一曰祀貢。二曰嬭貢。三曰器貢。四曰幣貢。五曰材貢。六曰貨貢。七曰服貢。八曰旂貢。九曰物貢。

此邦國職貢之數。自下貢上曰貢。隨其職方所有。不在九賦內。祀貢以奉祭祀。三牲魚腊之類。嬭作賓以奉賓客。筐篚玄黃之類。器貢以爲器用。金錫石磬之類。幣貢以爲六幣。璧馬皮幣之類。材貢木材。栝柏篠簜之類。貨貢金玉龜貝之類。服貢絲枲絺紵之類。旂旒通飾之垂動者。嬭珠璣組之類。物土物魚鹽橘柚之類。

以九兩繫邦國之民。一曰牧以地得民。二曰長以貴得民。三曰師以賢得民。四曰儒以道得民。五曰宗以族得民。六曰主以利得民。七曰吏以治得民。八曰友以任得民。九曰藪以富得民。

前言治具。此言治術。兩猶耦也。物有耦則不散。民與君繫則耦。散則獨。桀紂之爲獨夫也。無以爲兩也。故詩云。勿獨斯畏。於是有九兩繫民之術。王者所以設官用人之深意。無非固結其民而已。牧州牧牧養也。土地以養民。立牧茲土。使民戀其養而不去也。長官長以貴居上。使民知尊敬而不犯也。學校有師。師必

以賢欲民好其賢而不倍也教民以儒儒者學道欲民由其道而不違也宗宗子家必立宗以聯九族欲民合于宗而不散也守藏曰主有主以司其財欲民艷于利而不舍也治事曰吏分吏以治其事欲民從其治而不亂也朋助曰友爲之比鄰以相友欲民倚任而不孤也聚集曰數爲之邑里使安居欲民藪萃而不渙也

按九者盡所以繫屬萬民之術矣聖人治天下不廢然豈有意于繫民而爲此有意而爲是牢籠狙詐之私聖人無私得民而民自固以兩繫民驩虞之事也

正月之吉始和布治于邦國都鄙乃縣玄治象之漚于

象魏使萬民觀治象挾

夾

日而敘之乃施典于邦國而

建其牧立其監設其參傳其伍陳其殷置其輔乃施則  
于都鄙而建其長立其兩設其伍陳其殷置其輔乃施  
漚于官府而建其正立其貳設其攷陳其殷置其輔凡  
治以典待邦國之治以則待都鄙之治以漚待官府之  
治以官成待萬民之治以禮待賓客之治

此施行前所掌之事正月周正月建子夏時十一月  
也吉月朔也和猶調也始和取六典以下舊章斟酌  
更新以布于邦國諸侯都鄙卿大夫也縣書于版懸

之治象爲治之法象象魏雉門外兩觀巍然高起  
治象于上使人觀謂之象魏中開如闕謂之兩觀挾  
夾通中間一日曰挾日謂懸象三日遠收之也典謂  
六典前言以六典治邦國以八則治都鄙以八灋治  
官府此言施行也建牧長正以下皆施行之事邦國  
畿外諸侯之國牧州長九州各有長擇諸侯之賢者  
爲之大宗伯職云七命賜國八命作牧監者天子置  
吏監侯國秦置監郡是也監制參伍防諸侯之專也  
參三也諸侯三卿傳附也伍五也謂五大夫陳設也  
殷衆也謂二十七士輔助也謂府史以下庶人在官

者都鄙建長公卿大夫及王子弟之有采邑者皆長也兩猶卿也內長比外諸侯外參而內兩者內歷于天子殺也伍謂都邑之陪臣亦大夫其陳殷置輔同官府建正卽冢宰等六正官貳副也卽小宰小司徒等六職各副其正攷考功也六官各有攷以稽各屬之治功如大宰之宰夫司徒之鄉師宗伯之肆師司馬之司勳司寇之士師司空之考工皆是也大抵是書詳于官而重考所以爲名法之學凡治以下皆名法之意待者操本執要法立則百事可得成按六典以待邦國守八則以待都鄙執八法以待百官雖萬



民至衆有官府之八成則萬民治也賓客謂諸侯六  
典至九兩通謂之禮所謂周禮也行此則天下治諸  
侯賓服法所以爲治之本也

祀五帝則掌百官之誓戒與其具脩前期十日帥執事  
而卜日遂戒及執事祗視滌濯及納享普庚反贊王牲事

及祀之日贊玉幣爵之事祀大神示祇亦如之享先王

亦如之贊玉几玉爵大朝覲會同贊玉幣玉獻玉几玉  
爵大喪贊贈玉含玉

此節祭祀朝覲皆禮官之事而大宰掌之所謂官聯  
也祀王祀也五帝謂五方五氣在天之神每歲四時

迎氣各以所司之方祭于四郊中央土氣季夏迎于南郊祀黃帝之類是也下文又言祀大神示是別有天神尊者爲昊天上帝最尊配王而五帝配五官大宰天官首五職五帝天神司五氣故祀五帝之事宜天官掌之而祀上帝則王與六卿百官共非大宰所專也誓告也戒禁也告戒百官敬其事也具器皿也脩掃除也前期先祭期十日謂卜吉前十日散齋七日致齋三日而後祭帥大宰帥執事請宗伯大卜之屬宗伯掌禮大卜掌卜凡祭有常日此云卜者先後遲速之間也曲禮曰大饗不卜魯卜郊春秋譏之遂

戒謂既卜得日遂戒誓百官也及執事謂臨祭也祗  
視同滌濯洗祭器此祭日之先夕也納亨迎牲入庭  
告殺祭日之晨也王親牽牲大宰助之玉圭璧之屬  
幣帛也皆以禮神各如其方色爵獻酒器大宰執以  
從王授之曰贊事天曰神大神謂昊天上帝冬至祭  
于圜丘也示祗同地曰祗大示謂神州夏至祭于方  
澤也如之謂誓戒以下事同也享先王宗廟之祭也  
玉几以依神玉帝言爵先王言玉爵事天貴質事先  
盡飾也大朝覲會同六服總至十二年王不巡守諸  
侯同見也幣諸侯享王之幣獻幣幣外獻國所有珍

異皆有玉致之如小行人所合六幣是也玉凡王所  
凭以受朝者玉爵諸侯初至王禮之以酒諸侯酢王  
以玉爵亦大宰贊王受之也大喪王喪贈玉以玉送  
死納于壙含玉以玉實尸口玉爲北方水氣之精乾  
爲玉西北金水清潤之氣所凝故衆玉屬天官亦辨  
方之意也

作大事則戒于百官贊王命王眡治朝則贊聽治眡四  
方之聽朝亦如之凡邦之小治則冢宰聽之待四方之  
賓客之小治歲終則令百官府各正其治受其會古外反  
聽其致事而詔王廢置三歲則大計羣吏之治而誅賞

之

作猶舉也。大事謂大興作及兵戎之事。贊助也。王戒命則大宰贊之。眡猶臨也。治朝中朝在路門外。王日聽政之所。四方之聽朝。謂王巡守行在聽政之所。小治則冢宰聽。不必詔王待。猶聽也。四方賓客謂諸侯小事亦冢宰聽之。歲終謂每歲終各明正所治之事。爲文書以待考會。計簿也。宰夫職云歲計曰會。據其會以聽所致之事。辨其功罪。告于王。廢置之。廢黜也。置立也。稱職則使立其位。三歲則大計。有功賞有罪誅。不但廢置耳。

小宰之職掌建邦之宮刑以治王宮之政令凡宮之糾禁

小宰職見大宰此其事也餘倣此宮王府凡宮中之事小宰掌之刑刑法糾約束禁防禦也

掌邦之六典八灋八則之貳以逆邦國都鄙官府之治執邦之九貢九賦九式之貳以均財節邦用

典灋則貢賦式皆大宰掌之而小宰皆副之貳副也逆猶按也謂勾考之按典灋則以考治迹執貢賦式以均節其財用皆助大宰也

以官稱之六敘正羣吏一曰以敘正其位二曰以敘進

其治三曰以敘作其事四曰以敘制其食五曰以敘受其會六曰以敘聽其情

敘謂尊卑貴賤之序正吏以敘敘吏以位位者朝列之等級也進其治進獻治功于上有能者進而陟之必以敘也作其事督率供事以序貴者逸賤者勞也制食以敘尊者多卑者少也會計其政事財用以敘受其文書自長至貳無雜越也情謂功罪得失之情各因其貴賤上下之序聽察之也

以官府之六屬舉邦治一曰天官其屬六十掌邦治大事則從其長小事則專達二曰地官其屬六十掌邦教

大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長小事則專達五曰秋官其屬六十掌邦刑大事則從其長小事則專達六曰冬官其屬六十掌邦事大事則從其長小事則專達

此以下六條卽大宰八法中六事大宰提其要小宰治其詳六官卽冢宰以下六卿其屬各有小職六十合爲三百六十以象周歲三百六十日不言冢宰等而言天地春夏秋冬辨五行八卦之方位也乾爲天爲君位居西北不周之方而冢宰代天首物有天一



之象曰天官。天官水德也。萬物滋于水而養于土。資于天而生于地。故地官卽次之。盡東北有艮土。而震木出焉。故春官次之。木氣生火。相見乎離。夏官次之火。猛遇金。相尅爲刑。秋官次之。秋西方也。西成萬物將終。冬終也。冬官次之。冬主水。而西北遇乾。兌金歸根于母。而復命于父。故冢宰代天。而司空無位。是以唐虞之官。司空卽冢宰。總百揆。平水土。水降自天。土王于地。天地位而水土寄。故司空與冢宰同功。散其屬于五官。別作考工記。以寓天官考課之法。故曰國有六職。百工居一。法天之行。不見端倪。所謂陰符者。

也。今按其目。天官之屬六十有三。地官之屬七十有八。春官之屬七十。夏官之屬六十有五。秋官之屬六十有一。冬官工人二十有四。多寡參差。合之適滿六六之數外多一者。冢宰不在六屬內。以象天也。其餘二十二職有名無事。舊稱闕文。其實非也。長卽六卿也。事之大者。其屬不得自專。皆聽于其長。小事直行可也。達直遂也。六屬不掌于大宰。而掌于小宰者。大宰首六長。小宰首六屬也。

以官府之六職辨辨邦治。一曰治職以平邦國。以均萬民。以節財用。二曰教職以安邦國。以寧萬民。以懷賓客。

三曰禮職以和邦國以諧萬民以事鬼神四曰政職以服邦國以正萬民以聚百物五曰刑職以詰邦國以糾萬民以除盜賊六曰事職以富邦國以養萬民以生百物

大宰八漢官職爲要小宰詳之辨辨通力事曰辨治職以節財用爲辨教職以懷賓客爲辨禮職以事鬼神爲辨政職以聚百物爲辨刑職以除盜賊爲辨事職以生百物爲辨六者皆辨則治成而其要在官官効其職則治在邦國而及于萬民矣財用最急爲邦治之首外和諸侯爲輯寧之要事神獲福爲和諧之

月  
本方物畢至爲正服之效寇賊屏息爲詰糾之功民  
安物阜爲富盛之業脩之朝廷之上而折衝千里之  
外皆由官舉其職也

按諸侯封建皆地官事其屬有封人遺人門閭委節  
等職故賓客屬焉禮不止事神而鬼神爲先聚百物  
者司馬有九畿職方之貢也大抵是書多因六職通  
其意寄其謀而已達治體者自能融會俗儒不通必  
以類求之所以必改作也

以官府之六聯合邦治一曰祭祀之聯事二曰賓客之  
聯事三曰喪荒之聯事四曰軍旅之聯事五曰田役之

聯事六曰斂弛之聯事凡小事皆有聯

此因大宰官聯而詳其事也官各一事聯則衆官共一事國有祭祀有賓客執事擯贊非一人則相聯有大喪有凶荒治事賑救非一人則相聯軍旅田獵興作董率大衆非一人則相聯歲入斂收非一人歲出支取非一事甲之所斂乙之所施則相聯凡事雖小法無獨任必關通衆職互相勾考以杜旁落之奸而責奉公之效是書之機要也如世儒以類區別與作者意大相戾矣

以官府之八成經邦治一曰聽政役以比居二曰聽師

田以簡稽。三曰聽閭里以版圖。四曰聽稱責以傳附別。  
五曰聽祿位以禮命。六曰聽取予以書契。七曰聽賣買  
以質劑。八曰聽出入以要會。

此因大宰官成而詳其聽也。成，成法有籍可稽者。聽，  
猶治也。政，謂田賦役。謂工作比居，謂編戶。如司徒井  
牧比鄰，皆有圖籍。而賦稅力役，按此聽之。師軍也。田  
四時田獵簡稽。簡閱兵器士卒車輦牛馬等數書記  
而出師田獵，據此以聽也。閭里二十五家在鄉曰閭。  
在遂曰里。版書其戶圖其地，所以治閭里也。稱舉也。  
借貸者舉其物曰稱。責，索償也。傳，合也。別，分也。合書

其數各分其半。執之爲信。曰傳別。公私稱貸。用此以聽也。禮命。謂貴賤有定禮。策命。有等數。所以治百官之祿位也。取予。謂取財物給予。皆書其數。出入相合。爲契也。民間交易。以券爲信。大曰質。小曰劑。凡財用收放。皆有簿計。月爲要。歲爲會。八者皆書記之法。一定而不移。謂之成也。

按小宰以天子貳卿親簿書已瑣矣。況稱責賣買商賈細事。用以爲經邦成法。此管商之策。後世言利者率沿于此。或曰聽者聽其訟。如是則亦市官之事耳。以聽官府之六計。弊羣吏之治。一曰廉善。二曰廉能。三

曰廉敬四曰廉正五曰廉潔六曰廉辨

此以大宰官計聽之計稽也弊斷也方正曰廉吏以廉爲本貪墨則其餘不足觀矣善循良也能材藝也敬謹慎也正公直也廉諳練也辨辦同勸勵也六者盡爲吏之事矣

以廉掌祭祀朝覲會同賓客之戒具軍旅田役喪荒亦知之七事者今百官府共其財用治其施舍聽其治訟漢卽大率八廉戒備也具用也七事自祭祀至喪荒七征役曰施免役曰舍猶六縣之言斂弛也秋官大司寇害人者置之圜土而施職事謂施役也論語不



施其親謂親者免役也。訟以七事不平訟者。小宰聽斷之。

凡祭祀贊玉幣爵之事。裸將之事。凡賓客贊裸。凡受爵之事。凡受幣之事。喪荒受其含襚幣玉之事。

此小宰之聯事。贊玉幣爵三事皆從大宰贊王裸灌通將奉也。凡天子宗廟之祭。先酌鬱鬯獻尸。尸受灌于地以求鬼于陰也。天地之祭無裸而有玉幣。故玉幣重于裸。大宰贊之。裸將則小宰贊之。賓客謂諸侯來見王以鬱鬯禮之。亦曰裸。大宗伯代主。亦小宰贊之。受爵謂諸侯酢王。大宰受以奉王。王卒爵。大宰又

受之以授于小宰其受幣亦然幣者諸侯所以享王也舍以珠玉寶尸口襪以衣服贈死幣玉諸侯以凶荒賙王此四物皆小宰直受而達于王也

月終則以官府之敘受羣吏之要贊冢宰受歲會歲終則令羣吏致事正歲帥治官之屬而觀治象之灋狗以木鐸曰不用灋者國有常刑乃退以宮刑憲禁于王宮令于百官府曰各脩乃職攷乃灋待乃事以聽王命其有不共則國有大刑

月終每月終月計曰要以敘自尊達卑月要惟小宰受之歲會則大宰受之小宰贊之也致事各致一歲

之事蹟以俟考也。正歲夏正建寅之月。周正建子。大  
率和象以子月。其懸象觀法以正歲木鐸金鈴木舌。  
古者有新令。振木鐸警衆聽。官刑小宰專職也。憲猶  
示也。百官府王宮中之官府。各稽考其法度。守待其  
職事。以聽從王命。不供職有大刑者。官禁嚴肅。大于  
常刑也。

宰夫之職。掌治朝之灋。以正王及三公六卿大夫羣吏  
之位。掌其禁令。敘羣吏之治。以待賓客之令。諸臣之復  
萬民之逆。

宰夫職見大宰治朝路門外治事之朝。其位本夏官。

司士掌之。宰夫以灋治其違王及三公以下位次。詳司士羣吏。謂待賓客與諸臣萬民復逆之吏。報命曰復。上書曰逆。如地官之遺人。委人。春官之肆師。秋官之行人。掌客皆待賓客之令者。夏官之大僕。小臣皆待諸侯之復者。其御僕待庶民之逆者。宰夫皆以次敘治之。使各辦其事。

掌百官府之徵令辨辨其八職。一曰正。掌官灋以治要。二曰師。掌官成以治凡。三曰司。掌官灋以治目。四曰旅。掌官常以治數。五曰府。掌官契以治藏。六曰史。掌官書以贊治。七曰胥。掌官敘以治敘。八曰徒。掌官令以徵令。

此與下節皆考課之法。宰夫專職也。徵令督責其簿書之事。辨辦同。吏事準簿書。宰夫專掌之。正師以至胥徒八者。皆衆官府。要凡以至敘令八者。皆簿書。正六官之長。卽六卿。尊者職要。歲計是也。官濫以治要。依官府濫以治歲要。師卽所謂立其貳在天官。則小宰也。成謂成法。凡謂一切條例。比要加詳。司專察也。卽所謂設其攷在天官。卽宰夫也。八職惟司與正言法者。正乘法攷行法。目如綱有目。比凡尤詳。旅衆下士常。各職所常辦之事。數細目。府主藏藏皆有官契。可攷。史則專供簿書。故曰贊治。胥之言敘。有材謂諳。

官法故治敘徒卒也供召呼督促曰徵令府以下不言目與數而皆以籍爲準

按簿書考課法家之意歲有會月有要日有成自六卿下迄徒胥惟匆匆簿書期會是急則何暇盡情爲理莊周有云刻核太甚必應之以不肖之心文網多而精疲智昏吏治反麻情矣

掌治瀆以致百官府羣都縣鄙之治乘其財用之出入凡失財用物辟避名者以官刑詔冢宰而誅之其足用長財善物者賞之

治瀆卽八瀆八則等大宰所建小宰執以逆羣吏而

宰夫按之以攷也。乘記算也。辟名匿名詐取官物者。官刑司寇所掌五刑之一。長財能生財善物善製器物。

按是書先財用而行法尚廉察故小宰弊吏治六計以廉爲本宰夫攷羣吏失財先刑長財先賞匿名必誅可以觀作者之志。

以式凜掌祭祀之戒具與其薦羞從大宰而眡滌濯凡禮事贊小宰比官府之具凡朝覲會同賓客以牢禮之凜掌其牢禮委積膳獻飲食賓賜之飧孫牽與其陳數凡邦中之弔事掌其戒令與其幣器財用凡所共者。句

大喪小喪掌小官之戒令帥執事而治之三公六卿之喪與職喪帥官有司而治之凡諸大夫之喪使其旅帥有司而治之

此宰夫之官職也式灋九式財用之法禮重鬼神故其戒具豕宰掌之小宰掌之宰夫又掌之凡禮事卽小宰所掌七事小宰掌七事之具宰夫比校使備也一牢禮牛羊豕三牲具爲一牢法謂貴賤多寡之等詳見秋官大行人與掌客之職委積道路所設米芻之類待賓客者詳見地官遺人職膳獻謂禽羞時物之獻飲食謂燕饗賓賜王賜賓客飧熟食賓初至致食



卽今館驛之小飯牽生牢陳數陳設之數皆待賓客之禮大行人之事而宰夫兼掌之弔事王弔諸侯羣臣之喪事幣玉帛之類器送死明器財用含襚贈賻之類凡有司所供者小宰皆掌之大喪王喪小喪王后世子以下之喪小官士以下其大夫以上冢宰親戒令之執事謂當職者宰夫親帥以往治其喪職喪春官之屬官有司公卿死者家之有司大夫喪卑宰夫不自往使其旅下士帥大夫家之有司治之

歲終則令羣吏正歲會月終則令正月要旬終則令正日成而以攷其治治不以時舉者以告而誅之正歲則

以濫警戒羣吏令脩宮中之職事書其能者與其良者而以告于上

此宰夫專職也歲終周十二月建亥治不以時舉稽遲後期也正歲夏正建寅之月宮中之職事天官所屬多王府之事能幹吏良循吏每歲考得其人上其名于王以待三歲大計陟賞也

按大宰一職其事權重而科條煩密馭吏主法而尚嚴爲政主財而尚富皆衰世之意辭旨大抵變幻滑稽無端天體高故尊朔氣寒故嚴坎水滿故富宰能割故多飲食干事無不統而意主綜核百官稟受行

事亦欲如天不言四時行也

宮正上士二人中士四人下士八人府二人史四人胥四人徒四十人

自此以下職皆天官之屬冢宰司天宸居爲首宮王宮正長也天官書中宮天極是爲北辰太一之居宮言宣也緯書云中宮大帝其精北極含元出氣流精生物律家宮爲黃鐘當子北方天一之位天象最尊者故天官之屬首宮正焉其下五十九職飲食次宮室日用急需次醫藥以攻疾酒肴以養生出有次舍居有財用宴息有婦女縫染衣服之事而招魂死事

終焉此其序也。或曰：天官所屬皆以奉王起居寓輔養之意。古明王左右僕從罔匪正人。官屬先宮正其亦以此。

官正掌王宮之戒令糾禁以時比宮中之官府次舍之衆寡爲之版以待。夕擊柝而比之。國有故則令宿其比亦如之。辨外內而時禁稽其功緒糾其德行幾其出入均其稍去食去其淫怠與其奇基表邪之民會其什伍而教之道藝。月終則會其稍食歲終則會其行事。凡邦之大事令于王宮之官府次舍無去守而聽政令。春秋以木鐸脩火禁。凡邦之事蹕。旬宮中廟中則執燭大喪

則授廬舍辨其親疏貴賤之居

宮正王宮護衛之長戒令糾禁皆以約束官府如下  
文比稽均會等皆是比檢校也宮中官府如膳夫內  
宰等天官之屬多在宮中次公署舍私館衆寡兼人  
數言版名籍待備考也夕夜也柝兩木相擊司夜者  
所執比謂檢校諸宿衛者勿懈怠離部署也國有故  
遇災變也令宿如文王世子云公出疆庶子以公族  
守公宮夏官諸子國有大事帥國子致于太子唯所  
用皆令宿之事宮正皆比之辨內外辨王宮內外之  
人禁其非時出入也稍食廩祿也每月稍稍給之曰

稍民謂百官府家衆之屬。奇衆請觚非常者會其什伍。謂百官子弟皆合五人爲伍。二伍爲什。相連屬以便糾比也。教之學道習藝以備進用也。月終則會計一月應給之廩祿。歲終則會考一年所行事蹟。邦之大事謂大祭大喪大兵之類。去守離部署也。春秋脩火禁。三月建辰火星東出于辰。九月建戌火星西伏于戌。火出民皆用火。禁其不輯。火入民皆休火。禁其妄用。禁以防風燥之失。而王宮尤嚴。清道曰蹕。邦之事蹕。謂王有大事出入稱蹕。在宮中廟中宮伯執燭導王。蓋晨昏之間如祭祀是也。非晨昏在外則否。大

喪授廬。授王倚廬。以木倚路門外東壁檐下爲廬。孝子所居。舍聖室累塊爲室。門外偏處衆子所居。親貴者居倚廬。疏賤者居聖室。

宮伯中士二人。下士四人。府一人。史二人。胥二人。徒二十人。

伯亦長也。掌侍衛士庶子之事。

宮伯掌王宮之士庶子。凡在版者。掌其政令。行其秩敘。作其徒役之事。授八次八舍之職事。若邦有大事。作宮衆。則令之月終。則均秩。歲終。則均敘。以時頒其衣裳。掌其誅賞。

士。謂王宮中諸吏之適子也。庶子。衆支子也。古卿大夫適子皆入國。學爲士。其庶子。謂國子之倅。未爲士者。及公族功臣子弟。皆入爲護衛。有版籍。宮伯掌之。秩敘尊卑貴賤之等。作猶發也。庶子皆屬太子。有役則宮伯遣發。八次八舍。皆衛士之居。環王宮四隅。四中。相候望也。職事巡徼。徼備之職事。邦有戎寇大事。則起護衛之師。卽宮正所會其什伍者也。作宮衆以守王宮也。令戒警也。月終均秩。均所各當得之秩祿。歲終均敘。均一歲勤惰賢否也。夏衣冬裘。誅罪賞功。皆謂士庶子。



按古王者宿衛之士取諸同姓及功臣子弟賢者出與世子齒于學入從世子衛王宮教以德行道藝合以什伍糾以功緒優以秩敘上下情親相維體重以爲防禦故足恃也後世宿衛名取勲舊而僱倩市井亡賴長吏犬馬虐使之其誰非姦宄而何以備緩急宮伯之法不可不亟講也

膳夫上士二人中士四人下士八人府二人史四人胥十有二人徒百有二十人

膳夫飲食之司膳善也善則養

按飲食庖饗之職皆屬冢宰宰以調和得名冢宰調

和百官。猶膳夫調和飲食也。自膳夫以下庖人內外  
饗享人五職。用上士以下五百四十人。又酒正酒人  
漿蘧醢醢鹽人食醫八職。共八百三十六人。又獻醢  
腊人三職。三百九十四人。一飲食之司。設官十六用  
人一千七百七十。不已冗乎。

膳夫掌王之食飲膳羞。以養王及后世子。凡王之饋食  
用六穀。膳用六牲。飲用六清。羞用百有二十品。珍用八  
物。醬用百有二十。王日一舉。鼎十有二物。皆有俎。以  
樂侑食。膳夫授祭品嘗食。王乃食。卒食以樂徹于造。王  
齊。齋日三舉。大喪則不舉。大荒則不舉。大札則不舉。天

地有裁則不舉邦有大故則不舉

進送曰饋食飯也飲酒漿膳牲肉羞肴品之異味者  
六穀食醫云稌黍稷粱麥苽六牲爾雅云馬牛羊犬  
豕雞六清漿人云水漿醴涼醫醢羞六牲及水陸之  
品庶羞也天子百二十品上公四十品侯伯三十二  
品子男二十四品上大夫二十品下大夫十六品珍  
八珍詳內則淳熬一淳母二炮三擣四漬五熬六肝  
臂七醢八凡醢醢醢齊苴之屬皆謂之醬王舉則醢  
人供醢六十審醢人供醢六十審共百二十審皆一  
舉之具也盛饌曰舉日一舉每日朝一盛饌也王藻

云日中而餼則舉在朝鼎十有二謂牢鼎九陪鼎三  
牢鼎牛一羊一豕一魚一腊一腸胃一膚一鮮魚一  
鮮腊一共九陪鼎膳一肺一臠一共三物謂鼎中實  
皆有俎謂牢鼎各一俎各牲肉熟于各鼎升于各俎  
陪鼎之實卽庶羞在豆者無俎也以樂作樂食也侑  
勸也祭王將食祭先食豆間則膳夫授肺周人祭肺  
殷人祭肝夏后氏祭心有虞氏祭首品嘗食每品膳  
夫先嘗恐不調也以樂徹作樂徹饌也造造飲食之  
處卽廚也齋祭前十日每日三舉三盛饌用三大牢  
不食餽餘惡褻也大喪爨粥飲水則不舉大荒以下

皆不舉自貶損也。飢饉曰荒，天死曰札。

按王藻：天子日食少牢，月朔大牢，亦豐矣。鄭謂當從周禮，信以是爲周公之禮。與一人之養歲，刲羊豕豕八百頭，擊牛三百六十，用牛羊豕共千八十頭，一齋用九十頭。內外祭祀，無月不齋，則一歲食牛羊豕不下二千餘頭。鳥用此靡費爲也。齋則宜減嗜慾，薄滋味，清淨淡泊，以通玄漠，而乃益椎牛伐鼓，日三大饗，以爲饗食，何其倒行也。食品必膳，天先嘗，尤世主猜疑之事。惟五不舉，庶幾先王之遺爾。

王燕食，則奉膳贊祭。凡王祭祀，賓客食，則徹王之胾俎。

凡王之稍事設薦脯醢王燕飲酒則爲獻主掌后及世子之膳羞凡肉脩之頒賜皆掌之凡祭祀之致福者受而膳之以摯見者亦如之歲終則會唯王及后世子之膳不會

燕食謂日中及夕食膳卽朝食大牢之餘祭謂王食祭牢肉朝祭肺則日中以後餽祭肉亦膳夫贊之王祭祀獻尸尸酢則有俎饗賓賓酢亦有俎主人俎謂之胙俎猶主階謂阼階胙言祚福也胙俎膳夫徹賓尸俎執事者徹也稍事謂小飲食王燕飲羣臣不親獻則膳夫代爲主后與世子之饋掌之內饗其膳羞

亦膳夫掌之肉脩。謂腥肉與乾脩。析肉乾曰脯。治以  
薑桂曰脩。祭祀致福。羣臣家祭。獻肥肉于王。膳夫受  
以供王膳。卿大夫新任。執羔鴈等物見王。膳夫亦受  
以供王膳。歲終會計一歲飲食之費。唯王后太子膳  
不會。奉養至尊。不爲限也。餘頒賜皆會。

按是書先財用。軍旅會同祭祀。經費素定。歲終必會。  
唯王及后太子不會。亦表世逢迎之意。孟子所謂吾  
君不能謂之賊者也。古聖人治天下。躬先朴素。表正  
百官。猶有數廉節爲貪墨者。況君先侈靡。何以帥下。  
子云。其身不正。雖令不從。凡周禮之法。詳而端本之。

庖人<sup>中士</sup>四人<sup>下士</sup>八人<sup>府</sup>二人<sup>史</sup>四人<sup>賈</sup>八人<sup>胥</sup>四人<sup>徒</sup>四十人

庖廚也庖之言苞也裹肉謂之苞苴賈價同賈人買物知市價者

庖人掌共六畜六獸六禽辨其名物凡其死生蠃鮮鼈鼈考之物以共王之膳與其薦羞之物及后世子之膳羞共祭祀之好羞共喪紀之庶羞賓客之禽獻凡令禽獻以饗授之其出入亦如之凡用禽獻春行羔豚膳膏香夏行腍勃鰯鰯膳膏臊獷秋行犢麋迷膳膏腥冬行鱧鱧



羽膳膏羶歲終則會雉王及后之膳禽不會

掌共謂獸人供庖人掌也六畜卽膳夫之六牲養曰  
畜用曰牲獸禽謂野物爾雅四足而毛謂獸兩足而  
羽謂禽六獸內則云麋狼麇田豕狸兔之類六禽鴈  
雉鶉鷃鵓之類各有名色可辨新殺曰鱣乾久曰  
麇殺品曰薦滋味曰羞凡膳稱薦美者爲羞好羞羞  
之珍異者喪紀喪事繁稱紀庶羞蓬豆之衆羞也賓  
客之禽獻賓在館常日所供如掌客職上公乘禽日  
九十雙侯伯七十雙子男五十雙之類令獸人取禽  
獸獻賓則書所當獻之物與數授之取入如數較之

獻出如數授之用禽獻用爲膳烹調之法春夏秋冬  
四者順時氣也行猶行酒之行獻也春草生羔豚肥  
以羔豚爲膳和以膏脂之香者春氣香順木令也膳  
乾雉鱮乾魚夏物未成暑鮮易敗宜乾物膳燥氣膏  
用臊順夏令也秋物新成小牛爲獮小鹿爲麋腥金  
氣順秋令也鱸魚鼈羽鳧鴈皆水族冬肥獐羆毛之  
屬氣溫宜寒順冬令也膳禽四時所獻六獸獸亦謂  
禽膳以牲爲正王后世子皆不會禽爲加故世子亦  
會

按鄭以地官牛人爲土香爲牛膏春官雞人爲木腥

爲雞膏秋官犬人爲金臊爲犬膏夏官羊人爲火羶  
爲羊膏四時用獸皆順旺氣人弗能勝故用四時死  
氣之膏和之春木旺火相土死金囚水廢餘以此推  
凡五氣旺之所勝者死相之所勝者囚新謝者休廢  
辨方正位義或取此但據內饗所辨腥臊羶香未定  
以四物當之也

人  
內饗中士四人下士八人府二人史四人胥十人徒百

饗熟食也烹和曰饗內饗供王及后世子宗廟諸在  
內之食事

內饗掌王及后世子膳羞之割亨煎和之事辨體名肉  
物辨百品味之物王舉則陳其鼎俎以牲體實之選百  
羞醬物珍物以俟饋共后及世子之膳羞辨腥臊羶香  
之不可食者牛夜鳴則膚由羊冷毛而毳去羶犬  
赤股而躁臊鳥鱧漂色而沙鳴狸狸豕盲眊而交睫  
腥馬黑脊而般率臂鱣凡宗廟之祭祀掌割亨之事凡  
燕飲食亦如之凡掌共羞脩刑膳胖骨鱠以待共膳凡  
王之好賜肉脩則饗人共之

辨體名如儀禮肩臂膊胙之類肉物如魚鼈燔炙之  
類百品味謂庶羞之類陳鼎俎謂初陳鼎門外饌西

進陳阼階下。俎皆陳于鼎西。以牲體實之。謂取于鑊  
實鼎。取于鼎實俎也。百羞。卽膳人所謂百二十品。醬  
物。卽百二十饔珍物。卽八物。饗人皆擇美者供。以俟  
膳夫饋也。腥臊羶香。卽膳夫所行四時之膏。有不可  
食者。必辨之也。牛病者夜鳴。其肉必廕。廕猶同。臭草  
冷。零同。毛亂也。毳。冗結也。皆羊病之狀。其肉氣羶。犬  
股無毛。急走者。犬病也。其肉氣臊。鳥羽色鰯白無潤  
澤。其音嘶而沙鳴者。病鳥也。常不能飛。而狸伏。野猫  
曰狸。性善伏。故物伏者曰狸。鼈人謂凡狸物是也。內  
則作鬱。亦狸意。豕病。目如盲視。而睫交不開。其肉必

腥馬脊黑而前脰有班文者必變般班通蟻蟻也呂  
子云戶樞不蠹謂蛀孔也內則作漏如人痔漏馬蹄  
病也數者皆不可食共羞治羞供王也脩謂脩治乾  
肉刑割正也廐肥厚也胖判通析片也骨牲體鱗乾  
魚好賜王所喜好賞賜肉脩濕肉與乾脩也

外饗中士四人下士八人府二人史四人胥十人徒百  
人

主外祭祀及賓客等事

外饗掌外祭祀之割烹共其脯脩刑廐陳其鼎俎實之  
牲體魚腊凡賓客之飧饗饗食之事亦如之邦饗耆老

孤子則掌其割亨之事。饗士庶子亦如之。師役則掌其獻賜脯肉之事。凡小喪紀陳其鼎俎而實之。

外祭祀謂天地四望山川社稷五祀之類。刑膳見上。腊小物全乾者。殯賓始至饋熟食也。饗賓既行享致廩牢新芻也。饗主酒房烝體薦立而成禮也。食飯也。酒穀雖備以飯爲主也。如之待賓客事如祭祀也。饗耆老王制謂養國老于東膠。養庶老于虞庠是也。孤子死王事者之子士庶子卽宮伯之士庶子守護王宮者也。師役則以酒脯獻將帥賜衆卒小喪夫人以下之喪鼎俎喪奠及虞祔之祭也。

亨烹人下士四人府一人史二人胥五人徒五十人

主爲內外饗給水火者

按有庖人內外饗則亨人可省也

亨人掌共鼎鑊以給水火之齊原職外內饗之饗亨烹辨膳羞之物祭祀共大羹鉶羹賓客亦如之

鑊以煮牲牲各一鑊各一鼎熟于各鑊升于各鼎水火之齊謂生熟之節也職主也羹羹也辨辨通治也大羹鑊內煮肉之汁未和者盛以瓦登既和盛以鉶鼎曰鉶羹型金爲鼎是謂陪鼎賓客之饗食亦有陪鼎大饗亦有大羹故曰如之



無禾可食狼搏羣獸且傷人故取之夏禾方長鹿  
爲苗害故獨舉二物春秋則百獸惟所取耳時田四  
時田獵守畧以待禽也葬田止也注猶聚也地官山  
虞職葬田植虞旗于中致禽謂田止則虞人立旗爲  
表令衆以所獲禽送旗下計功也入獸于腊人爲乾  
禽也皮毛筋角入于王府給作器物也

敝漁人中士二人下士四人府二人史四人胥三十人  
徒三百人

敝漁同掌取魚

按獸人官多而胥徒少敝人官少而胥徒多馬融謂

池塞苑囿取魚處多然從獸之地豈獨少乎獸人官多備王于狩也徒少以旬師自有徒三百也

敝人掌以時敝爲梁春獻王鮪委辨魚物爲鱣鼈以共王膳羞凡祭祀賓客喪紀共其魚之鱣鼈凡敝者掌其政令凡敝征入于王府

時敝四時取魚有時惟夏不漁季冬乃大漁偃水爲關曰梁以笥承之取魚也鮪似鱣而青黑頭小而銳口在頷下大曰王鮪小曰叔鮪季春新出取以獻寢廟敝征漁于川澤者征其稅也

按孟子云文王治岐澤梁無禁敝人有征衰世之法

也豈文王公之而周公獨私之與

鼈人下士四人府二人史二人徒十有六人

鼈之言扁也。簠取之名。凡物潛伏者。以器迫地。扁取之。曰鼈。象形立名。非取鼈耳。詳目中所掌。義自見。秋官之屬多此類。

按既有鼈人。此職亦可省也。

鼈人掌取互物。以時簠。魚鼈龜蜃。凡羆羆物。春獻鼈。蜃秋獻龜魚。祭祀共廌。蟬蟬羆羆羆羆羆羆池。以授醢人。掌凡邦之簠事。

互物。物有甲者。互合也。蟬蛤之屬。甲皆合。藏泥中。以

物迫地取之曰簪。莊子云冬則搗簪于江。簪通龜  
以上非食品也。蜃大蛤。月令雉入大水化爲蜃。雀入  
大水化爲蛤。狸埋通埋。伏泥中。故須簪。龜蛤春肥。龜  
魚秋成。獻各以時。蜃蚌通一名含漿。蜃螺同。一名蜺。  
移喻長曰。廢圓曰羸。易傳爲羸爲蚌。皆狸物也。蜺蟻  
子國語。蟲舍蜺蟻。蜺卽蟻。蟻蟻也。皆取其子以爲  
醬。故授之醢人。凡簪地取埋藏之物。皆醢人之事。  
腊夕人下士四人。府二人。史二人。徒二十人。  
小禽全乾曰腊。腊昔也。昔所陳蓄也。

腊人掌乾肉。凡田獸之脯腊。臘脾之事。凡祭祀共豆脯。

薦脯臠胖。凡腊物賓客喪紀共其脯腊。凡乾肉之事。  
乾肉曰脯。臠大臠也。胖小片也。皆乾物。薦脯。邊脯也。  
按鄭以臠胖爲烹制鮮物。然則何云掌乾肉。邊人實。  
邊亦用臠。此非濡物可知。鄭又謂豆脯當作羞脯。據。  
邊人職有栗脯。疑脯非豆實。然脯可實。邊亦可實。豆。  
玉制云。乾豆是不專在邊也。脯之實豆猶腊之實鼎。  
更加烹臠在邊。則乾薦之故曰豆脯薦脯。文義原殊。

周禮完解卷一終